

丁文誠公奏稿

丁文誠公奏稿

卷之十七目錄

參辦蔡逢年摺

光緒五年五月十二日

健廠鹽搭配專銷片

同日

都江堰人字隄補修完竣摺

光緒五年六月二十一日

旨查覆官運局收支確數摺

光緒五年七月初五日

委員清釐鹽務片

同日

馬加國攝政義由青海入藏片

同日

都江堰分水魚嘴不能退修摺

光緒五年七月十三日

署理川督謝恩摺

光緒五年八月二十三日

旨覆陳摺

光緒五年八月二十三日

馬加國攝政義等改道由川入藏片

同日

機器局遵 旨停止報銷用款摺

光緒五年九月二十三日

覆陳機器局暫緩開辦片

同日

夔關收數短絀核實辦理摺

光緒五年九月二十三日

西充建武肅親王專祠摺

光緒五年九月二十三日

都江堰穩固安瀾各州縣涸復田畝片

同日

清查鹽務大概情形摺

光緒五年十一月初十日

忠州石砭廳等處計引改歸官運片

光緒五年十一月二十三日

參辦蔡逢年摺

光緒五年五月十二日

奏爲查明鹽道操行貪劣難期整飭並辦理鹽務推代發引各事案章朦混迹涉營私謹據實奏參革職查辦恭摺仰祈

聖鑒事竊惟道員職列監司有整率屬吏之責而鹽道總司鹺務責任尤重非廉正強直不足以示標準而資治理茲查明鹽道蔡逢年操行貪劣辦公朦混卽如各省司道庫兌收解款惟州縣報解丁糧及各省關報解稅課向有贏餘故定立解費藉以補平水之不足然亦祇論正短平水從未聞報解釐金亦有解費又於正短之外復有別項應補也至道府收受規禮天下皆同然亦祇收之現任州

縣從未聞於抽釐委員亦皆收受也。臣上年到川見釐金解數大減查知係總管釐局鹽道多私收局員規禮及勒索解費之故當卽全行裁革乃該鹽道並不遵從於委員報解鹽釐仍敢多立平水等項不經名目藉恣勒索委員深以爲累莫敢誰何又復收受局員規禮並於規禮外每令人函致局員爲其親故勒索幫費自數十兩至一二百兩不等查抽釐委員僅資每月薪水辦公旣須收禮索費苦無可賠又不敢抗遂有暫挪釐金勉強應酬事後自行借貸彌補者此皆查有卷據也又本年因採辦貢緞臣恐該鹽道未能核實時加考查乃近復查知該鹽道上年辦理於支發銀兩扣折平色每萬兩竟至六百八十餘兩之

多此外尙有別費以致承辦店鋪得所挾制於臨期解貢時竟將緞疋押當不交大費周折適有人在臣署呈告該鹽道貪私多涉此事臣以所呈與所查頗符擬親提一訊乃該鹽道家人膽敢向臣之巡捕索取呈詞並求將遞呈之人釋放而該鹽道亦兩次向臣索回遞呈之人一似惟恐訊問者似此不避嫌疑不顧體制若非別有情弊何至若此至該鹽道於改配改代發引各事臣上年卽查明有請將湖北鶴長計商積引全行改配減釐情事外間皆以鹽道圖得使費違章妄改臣查卷屬實當以事關舞弊嚴飭將已經改發之引勒限年內銷竣以後不准再發以杜弊端乃經札飭後又查知該鹽道續發此項改引一千三

百餘張臣惡其有意朦混僅嚴加詰責勒令追繳方冀寬其既往可以儆其將來乃近又查出所發興文鄰水各縣水陸引張復有加多增出情弊又閱黔邊局詳送領引冊內查明該鹽道有錯發水陸各引經該局移明更換該鹽道並不將錯發之引認真查覆又不將應換之引詳咨核辦輒將未發他處夾帶之引自行塗改字號送令更換夫引由部頒水陸號數自有一定所以嚴防詐僞卽偶有錯誤自應於查明後詳咨更正補換方爲慎重乃竟改換自由隨意混淆其他事之顛預含糊尙可問乎查該鹽道缺向在川省爲上臣去年奏行潼引復爲議定每銷潼引一張酌給該道公費銀三兩冀以飽其欲而期振作計四年

一年行銷滄引一萬六百餘張該鹽道得受公費已爲極多而他項所得尙不在此數乃其意甚不足動稱缺苦無賴若此尙望從何整飭乎夫該鹽道於陋規則恣意妄取於引張則只圖朦混且索費收禮至於釐局委員實屬駭人聞聽若再稍示姑容何以儆效尤而整頓綱相應請旨將鹽茶道蔡逢年卽行革職以儆貪墨至其引張混淆實爲鹽務大病亟須確切清查以昭核實惟鹽署弊深似海極易彌縫臣擬於拜摺後一面將該鹽道先行撤任迅派誠篤明幹之員接署俾可澈底根究如查有不實不盡再行從嚴參辦所有查明鹽茶道蔡逢年貪劣朦混難期整飭各緣由謹恭摺據實參奏伏乞

皇太后

皇上聖鑒訓示謹

奏

犍廠鹽搭配專銷片

光緒五年五月十二日

再據官運鹽局道員唐炯等詳犍爲縣之五通橋一帶從前產鹽極旺甲於通省迨道光咸豐年間井老水枯出鹽頓少繼遭兵燹後人民流亡近雖漸次復業廠市倍覺蕭條自前年開辦官運多方體恤設法招徠始增鍋數百口商竈漸有轉機然合計每年所產之鹽僅敷配引一萬餘張行銷黔岸已形不足戊寅綱復兼辦滇岸專銷犍鹽添配邊計水陸各引共折合水引四千餘道以後若能暢銷勢須加倍犍廠五通橋之鹽斷不敷配查附近犍廠之牛華谿係犍樂兩縣交界之地所產鹽觔向只專配上游計岸第鹽質稍遜行銷邊岸未甚出色惟當此滇岸開辦之

後鹽不敷配亦須預爲籌計以免掣肘茲議定以該廠之
鹽與橋鹽搭配行銷現已勸諭該處竈戶煎煉好鹽以憑
搭配同銷滇岸用補不足至涪黔邊岸向本多銷健鹽去
年勸令富廠竈戶多煎黑鹽試配邊岸黔民亦多購食近
來富廠產鹽之多遠過健廠俟滇岸暢銷後擬令涪黔邊
岸專配富廠黑鹽將健廠之鹽專配瀘州以上之滇黔各
岸庶使鹽旺之廠足敷購運各得其平等情請奏前來
臣查該道等所詳係通籌鹽飭之盈絀以定配銷之界限使
邊岸不致缺鹽自應如議辦理除批飭遵照並咨部外理
合附片具奏伏乞

聖鑒訓示謹

奏

都江堰人字隄補修完竣摺

光緒五年六月二十一日

奏爲都江堰補修人字隄工現經伏汛盛漲一律堅固並
前修砌之兩岸隄埂及淘挖江身通暢順流民田毫無淹
刷謹據實具陳恭摺仰祈

聖鑒事竊

臣

上年奏明修理都江堰工所有人字隄之金

剛牆及間段隄身經是年夏間江水異常漲發水勢洶湧
該隄偏立水中致被衝刷上年十一月水涸隄現臣委員
覆勘丈量合計衝刷人字隄之金剛牆及各段隄身共三
十七丈有零當經遵

旨飭令丁士彬等仍行補修卽據稟報自行籌款修補於
本年三月初將應行修補隄工全數修竣稟經臣督同成

縣道崇綱親往驗收工程十分堅實卽擬於驗收後據實奏報因前恩承童華等查奏摺內有補修隄工能否可靠尙未可知之語臣是以擬緩至六月俟伏汛盛漲經過後查看該隄身有無衝損並江流是否暢順民田有無淹沒再行詳晰陳奏茲節屆立秋伏汛已過所有本年都江堰水自四月二十一起至五月十五日止均漲至十八晝六七寸較之上年盛漲時淹沒水則之水尙小九尺餘寸而比之前數年大水則已相等查看新補隄工屹立水中一無衝動江水雖漲毫無漫溢民田均無損傷其自五月十五日以後至六月十七日止水勢均祇漲至十七晝十六晝五六七寸不等皆緣江身淘挖深通兩岸隄埂收束

得力是以盛漲時水流極順不致潰決爲害現在成屬各民田均皆出穗揚花極爲芄茂秋稼日內可收實堪仰慰聖懷至江水向於立秋後尙有一二次漲發然秋汛微弱不如伏汛之大當可無慮臣俟霜降水落後續查看江水漲發情形再爲具報外所有都江堰補修人字隄工現經大汛一律堅固並前修砌兩岸隄埂及淘挖江身均極通暢民田毫無淹刷各情形謹據實具奏伏乞

皇太后

皇上聖鑒訓示再此次補修隄工所有一切經費共實用銀三千二百餘兩係丁士彬等自行捐資修辦並未分毫動支庫款自應無庸造報至本年堰工丁士彬係於去歲

十月早經交卸例應歸現任成縣道崇綱經管臣因人字隄有補修之工是以將本年全河仍責成丁士彬經理如有隄身衝刷及民田淹沒等事仍惟丁士彬是問以釋疑慮現在伏汛正慶安瀾一俟霜清後各隄完固丁士彬亦可卸責卽以後承管之員亦再無可藉口合併陳明謹奏

遵

旨查覆官運局收支確數摺

光緒五年七月初五日

奏爲遵

旨查覆官運局收支確數恭摺仰祈

聖鑒事竊

臣

接准戶部咨議覆尙書恩承等奏陳川省官

運局徵收支發款項不符請飭詳細查覆一案欽奉

上諭著按照戶部先後奏咨各案迅將徵收雜款開支局用領收運本及撥借還款數目限期並新收各款如何分別存局解道及此次恩承等原奏所稱不符情節各歸各款詳晰查明具奏等因欽此欽遵知照前來伏查川省於光緒三年奏明開辦黔邊官運鹽務其時以本省協撥過多庫無存款成本無可籌辦原擬請借撥山東糧運兩庫

銀三十萬兩湖北釐稅銀十萬兩再由本省湊借銀十萬兩合成銀五十萬兩作爲官運鹽本分作八年歸還經部核議奉

旨允准臣卽於是年九月委員試辦詎開局時別省借款不能預必乃暫於藩鹽兩庫陸續墊借銀二十四萬兩先行發局購鹽而行銷口岸繁多鹽筋必須接濟計所借之二十四萬兩尙不敷購鹽成本而自廠至岸千數百里沿途舟運之費無出萬難停待其時東鄂借款尙無消息而川庫協撥不遑無計及此不得已乃暫撥借各屬寄省閒款銀一萬兩又陸續就近湊借犍富各局餘鹽票釐銀十四萬六千六百五十四兩零暫時作爲運費此項借款當

時議定成本領到後卽行陸續撥還且款係隨運借撥或一月一次或二三月一次每次或二三千兩或千數百兩零星湊集銀無定數撥無定時故未能先事預計成數具奏嗣後鄂省奏明無款可借東省僅允借八萬兩是年亦未解到而局已開辦數月其通行黔省全岸及近邊十三廳州縣各岸地廣岸多前墊借成本杯水車薪萬不能濟急須添籌而藩鹽兩庫一空如洗實無可挪又不得已在於川東道夔關鹽稅富榮釐金並省城當商生息各項下到處挪湊借銀二十六萬兩連司鹽兩庫前借之項先後合計勉足原奏五十萬兩之數嗣於四年三月始准山東解到借款八萬兩維時司庫待撥協饒正急卽將此八萬

兩扣留七萬七千兩抵作官運局撥還司庫墊款除扣抵此款外官運局實止借撥本省銀四十二萬三千兩原奏將司庫扣收山東解款一層漏未開除是以局本多開出八萬兩實在官運局止領到本省別省借撥鹽本銀五十萬三千兩與三年分奏請借撥五十萬之數只多三千兩是綜計鹽本連暫行隨運湊借運費兩款實共發銀六十五萬九千六百兩零並無七十三萬六千餘兩之數迨四年十二月官運局卽撥還當商生息借款銀六萬兩連司庫扣收山東解款銀七萬七千兩共已抵還借款銀十三萬七千兩此開辦黔邊鹽務領收運本並暫行借撥及已還借款之實在數目也四年冬季 臣 准部咨催令開辦滇

岸復經奏明接辦歸併黔邊官運局經理查滇岸及近滇之宜賓等十二廳縣計岸每年水陸額引約計二萬數千餘道黔邊成本以岸多道遠一時不能挪移又須另籌成本銀數十萬兩始能周轉開運雖先時曾經部議由兩江總督飭令淮商籌撥銀六十萬兩解作滇岸運本臣以淮商無此大力奏請停撥且開辦在即現在官運局徵存正雜各項約計銀數可敷周轉是以籌議與其遠待他省不可必得之款不如即將黔邊鹽務徵存正雜各項暫爲截留局中以作滇岸運本較形便捷立可舉行前於奏銷時已隨摺奏明丁丑綱黔邊鹽務共徵稅羨截釐銀六十四萬九千九百一十七兩零全數截留局中暫資滇邊購運

此兼辦滇邊鹽務截留運本之實在數目也覆查黔邊局辦理官運亦係仿照兩淮辦法如購引鹽一張或用鹽本銀一百兩卽將應徵稅羨截釐各項按照定章如數加入合爲一百數十兩發商售銷不獨成本萬無虧折卽應徵之稅羨截釐各項亦無絲毫蒂欠確係先課後鹽辦法又所購之鹽係按照時價買賣價值公平交易並無分釐浮取於商竈而商人踴躍領銷買賣亦有定限並不致有妨於民食惟黔局創辦之初以五十萬兩運本而應貴州全省及本省十三廳州縣計岸商販待購之鹽實屬不敷周轉且款非一時承領開辦時跋前疐後亦極爲難幸彼時各商踴躍認銷爭先繳鹽價銀約五十餘萬兩然後官局

陸續領到之鹽本銀五十萬始能接續開運不致間斷民食亦不致缺乏至此項帑本前於開辦時奏明分作八年歸還原係從寬籌計但計四年分官運局已移還藩庫銀十三萬七千兩是一年幾已清還兩年之款以後如能照此暢銷計四五年內即可將借款盡數歸還不必拘八年定限其本年接辦滇岸截留運本六十四萬九千餘兩事同一律亦應援照黔岸自本年始分作八年定限清還以歸畫一惟八年以後領收截留各運本均已歸還該局卽無官本憑何購運查此八年中應徵之稅羨截釐各項正款除每年原撥部庫仍抵作黔滇兩省協饒及支撥本省饒項外所有餘存銀兩應請報明盡數存留該局仍作滇

黔兩岸接濟運本借資周轉據黔邊總局道員唐炯詳請
奏咨並據聲明尙書恩承等前奏該局原報各冊內有局
費四萬八千餘兩並未入奏一節查原冊卽官運局造呈
丁丑全綱收支四柱總冊將局中各項出入數目無論已
除未除悉數開列無遺以清眉目至奏銷時劃除局費一
款原因前已奏明請免造報自應候部議覆另辦故未遽
列奏銷冊內又恩承等奏稱原冊內護本一款前後數目
不符一節查此款原報三萬五千餘兩係每引一張攤銀
一兩五錢以一兩作爲護本又因川省窮民極多議以五
錢作爲隆冬施粥經費以安飢民因施粥係另歸外銷故
於奏銷冊內每引劃除五錢共劃除銀一萬一千九百餘

兩未便並列以杜牽混又恩承等奏稱總局前呈清單列有開支水腳銀六萬兩此次又復刪除一節查此項水腳銀兩係鹽船到岸由岸局補發水腳尾數隨時支發隨卽攤入鹽引本內發商收回並非實在開支之款但岸局旣報明開支總局卽不能不另立此一款以期出入帳目鉅孔相符用杜委員挪移掩飾之私而旣經攤入鹽本收回若銷冊內不爲刪除又恐啟以後冒銷之弊所有水腳一項係隨時支發隨卽收回自不應列入奏銷冊內方免牽混而昭核實至本年春閒奉文查辦鹽務該局兩次呈遞清摺一係按丁丑全綱將官運局一切循環出入總數無論內銷外銷已還未還之項逐一開列所以昭清晰一係

查照奏銷報部清冊分晰應徵應支實在之項核實開註所以符原案合觀似覺參差分計各歸實數絕無絲毫含混再富榮犍樂各官引局徵收鹽釐厯係徑解鹽道轉解司庫其重慶鹽釐向係解存川東道庫聽候藩司指撥各處協餉均於官運無涉等情具詳前來臣覆查前年擬辦官運之初核計貴州全省及本省近邊十三廳州縣所需鹽本甚鉅因本省款無可籌是以奏請借撥山東湖北四十萬兩本省自行籌借十萬兩時因開局期迫別省借款急難指望本省庫款又復久虛幾有空拳徒奮之勢臣因事經奏准局已開辦不能中止督同司道儘力籌畫在於藩鹽兩庫陸續暫行借墊二十四萬兩原議俟東鄂兩省

借款解到先行歸還嗣鄂省咨覆無款可借東省雖允借
八萬兩未經解到萬不能敷始陸續湊借川東道庫釐金
五萬兩夔關鹽稅五萬兩省城存當商生息銀六萬兩富
榮鹽釐銀十萬兩先後合成五十萬之數作爲鹽本迨四
年分東省解到銀八萬兩卽由藩庫扣收銀七萬七千兩
實發官運局三千兩後以鹽船由廠赴岸道遠費重前借
成本原非一時全領而局已開辦旣須來回購鹽又須發
給運腳彼時實費周章臣因在省借撥各屬存寄閒款銀
一萬兩又飭唐炯就近在富犍各局餘鹽票釐項下先後
暫行湊借銀十四萬六千六百餘兩以濟一時之急此項
票釐原議一年之後卽隨時撥還歸款不准久延現已陸

續籌撥還款至原領之成本五十萬兩本係奏明按八年歸還現計四年分一年內卽已扣還司庫銀七萬七千兩又歸還存當商生息銀六萬兩合計共已扣還過十三萬七千兩是奏明八年歸清之款辦運甫及一年而歸還之數幾及兩年不可不謂踴躍以後如能照此暢行則原借成本可不必屆八年之限計四五年內卽可全數還清本年滇岸所借之本亦可照此歸還此係實在情形將來每年報銷到部自可一覽而知決不能絲毫含混也至唐炯督辦局務綜核款項稽查委員極爲精核臣隨時覆加詳察斷不准稍有弊端致滋口實茲據查覆各條核之原案歷歷有據如使稍有弊混則款項攸關臣斷不敢代爲掩

飾致負

聖主高厚之恩除飭催該道將徵收雜款開支局用各歸各款分造清冊咨部核銷並嚴飭各委員實力經理不准稍有作弊外所有遵

旨查覆緣由理合恭摺附驛具陳伏乞

皇太后

皇上聖鑒訓示謹

奏

委員清釐鹽務片

光緒五年七月初五日

再川省鹽務自道光三十年前任督臣徐澤醇清釐之後迄今屆三十載溯查引張之積滯年多一年款目之混淆日甚一日除滇黔兩邊本屬廢岸上年奏定章程另行設局辦理外惟查鹽道衙門歷年編發鹽引並不清界限年限挨次順發既將邊計各引互相套搭又將咸豐同治年間之引與光緒年間之引一併套搭隨意混發顛倒錯亂毫無次序而改代改配又復多方作弊以致書吏家丁奸商皆得因緣爲奸弊竇叢雜現在查對各關冊報以前驗放引張有年分號數相同先後重發者有塗改上年存庫陸引抵作水引由道移送黔邊總局者夫鹽引之號數

有定水陸兩引勛重懸殊何得由道署擅自塗改卽行備文移送可見從前積習太深竟以駭人聽聞之事視爲固然至歷年課款率多挪彼填此移東解西歷年旣久膠葛愈甚一切虧新掩舊之弊勢更無可稽考所關尤重而其尤可慮者鹽道署總司離務其緊要關鍵全在引張故請引須由部頒領引又須由總督過印然後發交鹽道收存以備地方官請領發商行運層層稽核所以嚴防詐僞乃查鹽道於請頒引張並不入庫任令存放科房卽此玩泄昏愊尙復何弊不作若再不澈底清查則以後直無從整頓惟鹽務之壞已歷數十載引紙案卷塵封山積且歷年引張有積存道庫者有已發各屬而乏商承領者有已經

發商尙未行銷而商人竟自攜帶回家者又有已行而未
截繳者事關通省百餘州縣清查殊非易事臣現酌定清
釐章程七條檄發藩臬兩司暨新署鹽茶道董潤會督成
都府責令分年分地分款詳細確查並添派明白公事之
候補道錦瑞馬映奎二員督同府州縣數員赴鹽茶道署
設立清查公所逐一檢齊卷宗挨次清理某年某岸應領
額引若干存庫若干已發若干未銷若干此岸之引改配
彼岸者若干已繳若干未繳若干各屬應解課稅羨截餘
力釐金各款何處欠繳何項若干或欠在官或欠在商或
欠在引收解之款何款實由省支何款由外提撥通計收
發數目是否相符務期一律清楚俾積弊藉可釐剔離網

賴以整頓所有現在委員清理鹽務情形理合附片具奏
伏乞

聖鑒訓示謹

奏

馬加國攝政義由青海入藏片

光緒五年七月初五日

再

臣前准陝甘督

臣

左宗棠西甯辦事大臣喜昌先後來

咨以馬加國世襲伯爵攝政義隨帶凱羅兩人擬由上海
歷湖北陝甘出嘉峪關因而入藏經總理衙門給發護照
咨行轉飭沿途保護嗣該游歷官至肅復擬改道西甯由
青海覓通藏路徑自西甯一百一十里至申中卡地屬青
海自申中卡至柴達木約二千里係海北通藏大路地遠
而荒恐有野番劫掠擬令隨同玉樹會盟便員行走計期
五月內可至柴達木其柴達木以西皆川藏地界咨請派
員直至柴達木面爲接護各等由准此當經

臣

寶楨會同

臣

恆訓查明西藏至西甯程站鈔單飛咨駐藏大臣松淮

轉飭漢番各官並檄令各臺站文武糧員揀派得力弁兵先期駐紮各交界處所偵探如已由柴達木起程前來卽行首先迎護復因西藏距西甯甚遠應查明柴達木地方庶免派員前往別有歧誤惟徧查西招圖畧並無柴達木地名又復博訪周諮查得柴達木在肅州邊境之西哈密之南路達安西爲巴里坤後戶若自西甯繞青海之北經和碩特各旗境折而西行始至其地復由玉樹一帶行走以達西藏應在拉里以北迎護復經開單咨送駐藏大臣請迅派員弁帶領兵役多名循途迎探直至柴達木地方面爲接護並飛飭各臺站文武轉飭土司各按單開道里探明行徑隨處接替保護俾無疏失又查打箭鑪管轄之

德爾格特土司屬境亦與西甯西藏交界雖道里較遠仍應加意防護檄令該廳文武札諭土司飭派頭目土兵速往邊境探迎以備不虞且查柴達木在西甯之東川藏之西而川境與西甯接壤者全在松潘其交界之曲那木地方向有果洛克野番時出爲患昔年駐藏大臣恩麟由藏從西甯一路回京道經其地曾被劫掠尤當預爲設法嚴防又已專檄該鎮廳會派員弁多帶得力兵役預在曲那木等處駐紮力爲防衛並分飭界連之懋功協廳一體探明保護前進用昭慎重所有派出各員弁兵役經費口糧均准其作正開銷以資實力迎護如敢虛應故事並不認真派護者查出卽行嚴參並飭將派出名數及接護入境

出境日期各緣由據實飛報查考均經迭次咨商駐藏大臣妥爲辦理並請嚴飭夷情部郎約束所轄與玉樹界遠之三十九族番衆輪替接護不准稍有疏玩一面再查先後單開程站果否確實此外如別有可通之路仍當另行派撥員弁督率兵役隨處保衛以期周密各在案竊思洋人入藏游歷爲藏中第一要務該藏番蚩愚成性理諭難通臣等時時顧慮殊費躊躇臣寶楨前與駐藏幫辦大臣色楞額遵

旨預籌藏務情形曾經奏明俟色楞額抵藏後與松淮安商定議再行奏明辦理茲色楞額甫經前往尙未聞抵任之期而游歷官如剋日旋來誠恐開意外之衅蓋其未入

藏境以前也既慮野番之劫掠其既入藏境以後也又慮藏番之阻攔而臣等又相距六千餘里而遙實有鞭長莫及之勢惟有隨時隨事盡心籌畫總期防患於未然並咨商駐藏大臣設法駕馭善爲開導該商上人等責成沿途保護入藏再飭拉里及巴裏各塘委員選派得力弁兵隨同照料更加嚴密稽察毋任私行其意俾該游歷官不致稍有疏虞以安遠人而紓

宸廑所有照護馬加國游歷官攝政義等由西甯入藏先行咨會沿途迎探並曉諭藏番妥爲照料詳細情形除咨明總理各國事務衙門並俟該游歷官抵藏後再行奏報外謹會同成都將軍臣恆訓附片陳明並將前藏至西甯

程站另繕清單恭呈

御覽伏乞

聖鑒訓示謹

奏

都江堰分水魚背不能退修摺

光緒五年七月十三日

奏爲查明都江堰之分水大魚背勢難向後退修恭摺覆

陳仰祈

聖鑒事竊

臣

承准軍機大臣字寄光緒五年二月十二日

奉

上諭恩承等奏履勘都江堰隄工相度形勢惟有仍守成法將分水大魚背退修原處再將外江淤沙淘平內江深溜平墊準以水則定以水平庶內六外四分水可均等語著丁寶楨按照該尙書等所陳各節督同司道等悉心妥議具奏等因欽此遵卽檄行司道會同悉心籌議並札飭該管廳縣相度形勢詳細查覆茲據布政使程豫署按察

使崇綱署鹽茶道董潤署成縣龍茂道徐景軾等詳轉據署水利同知劉廷恕灌縣知縣陸惠疇具稟道查都江堰之大魚背爲成都府屬十四州縣分水緊要關鍵向有內外四之說係專指春水初發灌漑田畝而言蓋因外江所溉田畝止及四縣內江所溉田畝共有十縣就兩路用水田畝之多寡以分差等迨夏汛盛漲洪濤騰湧一望汪洋則但求去路之通暢無阻不能拘定水則溯查該堰之分水大魚背從前創設原在安瀾索橋之下嗣因河道遷改靡常承修之員循流溯源將分水魚背節次向前移置其移自何年代遠難稽惟查道光七年前任水利同知張望泰所記其時分水大魚背已在安瀾索橋之上則移改

自在道光以前並非始於近年推考向前移置之故自以
上游之江源早分則下游之水勢可殺卽本秦時李冰鑿
分內外兩江以殺水勢遺意實非省工包砌所致且魚嘴
愈上則受衝愈甚非惟工不能省必須加倍堅固方足以
捍急湍去年署灌縣知縣陸葆德等承修大工卽就索橋
以上舊基興修大石魚嘴長十六丈高二丈底深一丈是
年夏水異常暴漲僉稱罕見雖大魚嘴以下之人字隄身
間有衝刷而大魚嘴仍帖然穩固今歲夏汛固較去年略
減而比前數年大水則已相等江流仍毫無漫決民田亦
毫無損淹成效昭然此時若將數十百年已成之舊基全
行挖掘退修四十餘丈不但工費浩繁難以籌計而退修

之後各隄堰之成敗利害實難逆料並據灌縣紳耆張映
極余漢章等先後具呈該紳民等生長江干五六十年以
來目擊分水魚背在索橋之上歷年久遠現在兩江河身
尙覺內低外高若將魚背退修數十丈則內江愈低夏水
驟漲勢必專趨內江沿河十縣糧田將成澤國是利未形
而害已著且自去年大修之後已歷兩次夏汛水勢之大
前所未有祇因隄岸東水得力沿江民田廬舍均毫無衝
淹不似從前之年年漫溢田畝被害民閒共深欣幸合詞
懇免退修情勢迫切該司道等查核無異據情會詳具奏
前來臣查都江堰之大魚背爲內外兩江分流總口成都
等十數州縣農田民命皆繫於此細閱恩承等原奏議將

分水魚背退修四十餘丈係恐內外分水不均期復道光以前舊制惟查恩承等勘工之時正在冬令水涸以後而於前數年江流之漲發漫溢民間迭遭水患情形未曾目覩至臣屢詣江干多值大水之際詳查水勢並詢之三農父老僉稱分水大魚背移設索橋之上已歷五六十一年內外兩江自此劃分使下流水勢稍殺如另議退修則上流之急湍狂瀾併力直注恐新工無從下手而人字隄當衝更甚尤易潰決復統觀兩江形勢當春耕播種之時利在關截停蓄以均輪灌至夏汛盛漲利在宣洩疏暢以保十數縣田廬而宣洩要法不外源流界畫分明以均水利而期通暢且所謂分水者必須迎上流徧注之水勢以定

界址斯分多分少乃有斟酌若上流之水勢既愈刷愈寬而下流之分水魚背復向後縮退揆諸分水情勢實覺無此辦法所有都江堰現在分水魚背既爲分別內外兩江水路而設現在根基又已穩固該官紳耆民等一聞退修之說情急勢迫僉請無庸更議以免上游之水盡趨內江漫淹滋懼係屬實情臣經歷兩年實不敢輕議更張致貽無窮後患至外江之淤沙宜淘內江之深槽宜墊無使內低外高係爲均平兩江水則起見乃屬照常辦理之事須俟冬令水涸遵

旨督屬妥辦以期有利無害仰紓

宸廑所有籌議都江堰分水大魚背勢難向後退修緣由

理合恭摺覆陳伏乞

皇太后

皇上聖鑒訓示謹

奏

署理川督謝 恩摺

光緒五年八月二十三日

奏爲叩謝

天恩恭摺仰祈

聖鑒事竊

臣接准吏部咨開光緒五年六月二十二日奉

上諭吏部奏東鄉案內大員處分一摺三品頂戴革職留任四川總督丁寶楨擬罪輕縱始終偏執著照部議革職丁寶楨平日勇於任事操守尙好惟性稍褊急遇事操切是其所短四川吏治廢弛風氣浮靡該督到任後竭力整飭不避怨嫌且於鹽務力排衆議變通辦理規復滇黔引地卽爲復還淮岸之計自應責成一手經理以觀後效丁寶楨著加恩賞給四品頂戴署理四川總督該署督當仰

體朝廷棄瑕錄用之意於力求整頓之中仍勿操之過盛
凡用人行行政一切虛心體察實事求是務令吏治奮興商
民樂業方爲不負委任儻辦理無效辜負殊恩必當重治
其罪懷之愼之欽此臣跪讀之下感悚交榮伏以臣賦質
愚頑辦事粗率迭蒙

聖慈之曲貸已非捐糜所能酬茲以議罪輕縱重干吏議
法無可恕罪實難辭乃復渥荷

殊恩不忍立加屏斥伏讀

聖訓殷殷旣

顯示

臣

以短長之分而切望其改過以從善復

曲誨

臣

以率由之準而深期其愼始以圖終似此

破格之矜全雖

慈父母之噢咻赤子萬不至是

臣

撫衷循省伏地叩頭殆

不知涕之何從也此後惟有懍遵

慈訓益深警惕不敢稍事操切不敢偶涉因循庶幾勉竭
駑駘以冀仰答

高厚鴻慈於萬一所有

微臣

感激下忱謹恭摺叩謝

天恩伏乞

皇太后

皇上聖鑒謹

奏

遵 旨覆陳摺 光緒五年八月二十三日

奏爲遵

旨查明覆奏恭摺仰祈

聖鑒事竊

臣

於八月十五日承准軍機大臣字寄光緒五

年七月二十四日奉

上諭有人奏訪聞四川西北東南各府州縣均於本年五月十二日同時地震房屋既有坍塌人畜亦多壓壞者保甯府等處城垣傾圮更有地裂之處至十五六二十三等日始止該署督竟諱災不報並聞南部因加釐啟衅蓬溪亦因設卡滋事等語著丁寶楨詳細查明迅速具奏毋許稍涉隱飾遲延致干咎戾原摺著鈔給閱看將此諭令知

之欽此欽遵寄信前來

臣

跪誦之餘莫名悚惕查四川省

城於本年五月十二日寅刻微覺地動歷時僅半刻惟門
鑼箱扣微作響聲餘別無事故城內外居民尙多有不及
覺者臣以省城地動雖屬輕微究係災異且聞省外各屬
亦有同時震動者其實在有無輕重情形應俟各府州縣
查明稟報到時始能詳悉具奏辦理惟川省地勢寥遠自
五月底後始陸續接據重慶綏定潼川雅州夔州綿州及
梓潼劍州巴州江油彰明石泉平武安縣縣竹合江綦江
合州南川等十九屬先後稟報各該屬初十十二日地動
情勢甚輕並無坍塌城垣房屋傷人情事惟綿州稟稱州
城垛口坍塌八箇餘俱安定續又據閬中羅江平武廣元

昭化蒼溪漳臘等七屬稟報閩中於十二日地動城垣安堵惟東路青龍花垣兩場間有牆壁破壞之處平武亦惟距城一百二十里之茨灣地方有石巖滾落七丈餘將巖下住居趙金鳳草房壓壞壓傷婦人二口餘均無倒塌房屋傷人之事其廣元昭化羅江漳臘四屬稟報各該縣地動查勘城牆垛口微有坍塌鼓裂數丈及數尺之處內惟廣元民房坍塌十餘處壓傷劉姓花姓女孩二口昭化城外賈家河牆坍塌壓傷賈張氏一口餘均無損傷人口情事惟南坪一營稟報地動情形甚重城署房屋倒塌甚多內又有珠河場河溝被溝上山巖墜塌將河身壅塞後復衝開水勢洶湧致將河北街民房盡行淹壞傷人甚多而

順河以下哈沙溝青龍場等處亦同被災等情此外各府廳州縣俱未報有地動之事其酉陽州一屬距省極遠往返須兩三月現尚未稟到臣查此次地動現據稟報者二十七屬其中重慶等府及梓潼等縣共十九屬情形極輕閬中等七屬僅稟稱城牆城垛有鼓裂坍塌數丈或數尺之處均未損傷人畜情形亦輕惟南坪一處係屬番地被災甚重臣六月初聞該處地動恐有成災已經先行委員前往會同確查城垣倒塌及損傷人口多寡情形稟報以憑籌款撫恤至今尙未據會稟前來竊維向例於奏報災異須俟各屬將有無輕重實在情形查明稟到後臣再委員前往會同切實覆查有無成災及災傷分數分別核定

一併奏明辦理以昭慎重而期核實此次地動因自五月至七月底始據各屬先後稟報到齊而南坪一處委查至今尙未稟到西陽州一屬亦以道遠稽遲是各該屬輕重有無實在情形不能卽定未便冒昧遽行具奏遲延之故實係於此並非敢諱匿不報也惟臣奉職無狀致召災異咎有攸歸仰懇

天恩立予譴逐以弭災害至臣前於五月地動之後自恨疏庸不材痛加怨艾並通飭司道以下各府州縣暨各綠營將弁等一體認真辦公不准再涉因循玩忽並率同司道府在昭覺寺焚疏自責以深儆惕茲因遲延致被參奏欽奉

飭查惶悚無地夫復何辭惟有將現在稟到各屬先行詳細陳明上慰

宸廑至南部抽釐舉辦多年此次辦法照前係屬從減並未加增其蓬溪設卡實有不能不辦之勢緣南部蓬溪本有額定井口額行引張定例係以本縣額煎井鹽銷本縣額行鹽引自咸豐以來各竈戶私開井竈較原額多增數倍冀圖多得鹽觔漁利彼時官不查究遂致私販充斥概將私鹽紛向有引各口岸灑賣而各口岸之額引日滯至同治初年井竈愈多私販愈盛萬難查禁不得已始爲抽釐藉濟軍餉兼資查考竈販私數而所議抽釐之法又復不善南部則交紳士包抽官爲代解其年中抽數多少官

不得知亦不過問蓬溪則皆由竈戶自賣自抽亦係官爲代解計南部定爲年解釐銀六千兩分作三批每批解銀二千兩蓬溪定爲班口釐金由竈戶自收每年解錢八千串乃三年臣到任後考核通省釐數始查明南部每年應解釐銀六千兩自同治二年起至十一年止各首事共虧挪銀八千兩又自同治十二年起至光緒三年五月止甫經四年又虧挪銀一萬二千三百兩計共虧挪釐銀一萬八千兩其同治十一年以前虧挪首事無從查問同治十三年至光緒三年係首事向東陽等虧挪八千兩姚觀成等虧挪四千三百兩現在飭縣著追臣以四年之內該縣首事虧挪釐銀至一萬二千三百之多是抽釐助餉

國家徒負虛名盡供貪紳中飽實堪痛憤是以將該縣釐局改爲委員抽收詎查該縣從前論勛抽釐其鹽秤係以九十六兩作一勛較他處所用天平秤一勛可作六勛殊無情理臣以此等罔上行私亟宜改革然尙祇改爲二十四兩作一勛較天平秤尙加多八兩刻計每鹽一勛抽釐錢四文以從前九十六兩作一勛比較現抽釐數每勛尙不及一文臣又查該縣前定抽收釐金章程不問井竈興衰係一概虛擬定數故井少之戶與井多之戶一例完釐實屬偏枯是以照富健就竈抽釐辦法令釐從鹽出如竈戶有鹽賣出則抽釐鹽未賣出則不抽毫無偏私抑勒之弊而改定釐金章程後所有從前各首事尙欠解三年五

月以後釐銀四千九百兩各竈紳邀請減免臣亦允照辦
用紓民力是事事委曲調劑亦可謂聽從民便矣至蓬溪
一屬私販較南部尤衆所有潼川屬之南充廣安等州縣
引岸全被充塞引商爭訟不休而從前所定之班口釐金
應解錢八千串每年亦祇解三千串不等其餘是否侵蝕
均不可考上年各竈戶呈懇減收臣又爲酌減一年三千
串而仍不照數完納嗣詳查情形亦緣前定班口釐金由
竈戶自行抽收不論井竈衰旺概令一律完釐其中苦樂
不均臣亦仿照富饒辦法令竈戶有鹽賣出則抽釐鹽未
賣出則不抽使井多鹽旺之戶不得獨專厚利井少鹽乏
之戶不致隨從賠累民甚稱便而新章開辦後所有前定

在口釐金亦爲減免處處令民獲利體恤實已備至至設卡一事實以該縣私販盈千累百無可稽考乃定爲每販買鹽一挑給票一張設卡驗收以杜弊混此乃無論抽釐與否必須辦理之事因釐局派出之委員候補從九湯桂生驗有無票之鹽驟行查拏各私販恃衆滋鬧蓬溪縣知縣因派本地團首周煥堂帶領團丁前往彈壓該私販等又在周煥堂所開之錢鋪肆鬧該團丁等上前攔阻互相爭鬪致戳傷私販六人並未斃命當時實無派勇擊散殺傷十數人之事詎該私販因與周煥堂尋衅膽將其父塚挖掘蓬溪縣遂將周煥堂撤回一面查拏爲首滋事挖墳首犯並稟經臣飭派駐紮太和鎮勇營前往出示彈壓該

難理諭並舉前數次赴藏洋人及臣所派委員均被阻改
道各情剴切與言又以川省保護亦祇能至交界之巴塘
爲止此外係屬藏地向無管轄不能前送卽勉強護送而
彼此呼應不靈亦屬無益至駐藏大臣派人迎護自是一
定辦法惟駐藏大臣在藏亦不能盡管藏番之事其中尙
有藏王主持且旣係入藏藏地乃該番地土彼旣不願人
前進駐藏大臣亦豈能強以必從況駐藏大臣所派亦祇
是派撥番人今旣不肯令人進藏卽派之必不能聽駐藏
大臣亦屬無法請其細加詳度不可倉卒執意等語該洋
員初不相信及臣與之辯論多時始覺有知難之意惟其
堅忍成性不肯遽行遷就臣當時自行籌度此時若急於

阻止遽令改道彼必以爲我等有意阻攔將來反謂藏番一切情形皆我等主使必多饒舌不若仍速其前往使彼知我之並非故爲攔阻以釋其疑乃特派委明幹之員隨同前行密諭以彼到巴塘時先不必用言勸阻但將現在藏番攔阻甚力一切實情與之言明卽請其派人會同委員前往交界處所一爲查看再定行止臣料該洋員在此經臣設法解說已大有改道之意若到巴塘外一看藏番情勢當必廢然思返迨彼自知其難向委員商量行走之路然後委員乘機與言從前各起進藏洋人均係在此改道由雲南前赴印度請其自爲斟酌如不願冒險惟有仿照辦理彼時該洋員實逼處此無可如何自不得不從旣

從之後再爲多派兵役妥爲護送至雲南交界即可安然前進如此辦理該洋員乃無可藉口而此次能阻其不得進藏則以後游歷之員亦不至接踵而來庶可獲數年之安此乃欲收先縱之法臣用意如此已密諭該委員等遵照妥辦總期不令入藏生事庶以仰慰

聖懷現在該洋員已定於二十五日由省起程臣已派撥弁兵人等沿途妥爲保護俟其到巴塘後如何情形再行奏陳所有設法勸阻洋員入藏各情謹附片密陳伏乞

聖鑒訓示謹

奏

機器局遵

旨停止報銷用款摺

光緒五年九月二十三日

奏爲川省前設機器局業已遵

旨停止所有自設局起至停止之日止一切經費均係實支實用開單具報恭摺仰祈

聖鑒事竊

臣

前年由東赴蜀時因知川省各營亦多習用

洋槍購自上海價值甚貴又不知修理之法用損卽成廢物殊爲可惜當經奏明隨帶候選同知曾昭吉來川擬設一機器局仿照外洋巧法自行製造修理迨到川後復奏明於成都省城擇地建屋設局委員遴選工匠製造機器所需經費不動正款卽由川省土貨釐金項下另行酌籌樽節動用俟造成後奏咨請銷奉

旨飭部知照在案本年接准部咨以恩承等所奏川省所設機器局費用較鉅製造未能精良等語欽奉

上諭著將此局停止以節糜費當卽欽遵檄行該管道及各委員將機器局先行停撤並飭將前後支用款項據實造報去後茲據卸管機器局署成縣龍茂道徐景試等會詳該局購地營造局房自製機器均係仿照西式共分建大小廠房一百八十八間崇垣大柱覆屋重簷安設鐵鑪煙筒風箱氣管四通八達取材既富用工極堅與內地營造之法不同又創設水機器靈動活潑視洋人專借大力尤爲事省功倍

委員駛往上海兩次購買外洋緊要機器及洋鐵洋鋼等項所費不及萬金其餘機器均由川

省自造一年以來自行造成水輪機器及各種機器共二十五部未合成機器及工用器具等項共一萬二千零六十九件已合成前門後膛等槍共一百四十八桿未合成洋槍共一百六十一桿所有按月支用經費悉照原奏不動司庫正款均於另籌土貨釐金項下支用計自光緒三年十月起至五年閏三月撤局之日止共支用過庫平銀七萬七千三百五十二兩八錢三分二釐七毫一絲二忽五微連委員薪水匠作工資一併在內均係實用實銷較之別省機器局所費僅十分之一卽較之東省機器局所費亦省十之四五該道等督同各委員逐款核算明確開具清單詳請奏咨前來

臣

查川省自行募選內地工匠修

造槍礮並自造機器事屬創始並無舊章可循廠屋配合
機器聯絡運動均係仿照西式一律鞏固所需銅鐵等物
亦多購自外洋與內地物價不同而委員曾昭吉心思奇
巧教練工匠創製水機較火機尤爲靈便所造各種輪機
器具已成未成共有萬數千件雖未竣工其洋槍堪以臨
敵備用者已有百數十桿現已飭交籌餉局委員一併加
謹存儲毋任損壞以備應用伏思臣於同治年間在東省
會勦捻匪親歷行間所用東淮各軍多以洋槍洋礮縱橫
攻擊其摧堅破敵雖髮捻各股匪動以數十萬計每遇交
鋒我軍槍礮所及莫不披靡直東兩省遂收聚殲之功川
省介在邊陲數千里番獠苗蠻環列窺伺而內地人情浮

動伏莽時虞雖兵可百年不用不可一日無備臣重膺疆
寄居安思危不敢不深謀遠慮是以上年有奏設機器局
並合東蜀兩省妥辦之議今已遵

旨停止所有自設局起至撤局止支用一切經費據該局
開報實數呈送到臣覆加查核無異惟此項製造一切均
係仿照西式辦理卽購買之機器銅鐵各件向無例案可
循是以各省機器局均係開單奏咨查銷川省此項報銷
自應援照辦理除分咨總理衙門及戶工二部查核外理
合恭摺陳奏並照繕清單恭呈

御覽伏乞

皇太后

皇上聖鑒訓示謹

奏

謹將川省機器局自光緒三年十月開辦起至五年閏三月二十日撤局止實支實用經費數目開具清單恭呈

御覽

一 管收先後支領成縣道收存另籌土貨釐金庫平銀共七萬七千三百五十二兩八錢三分二釐七毫一絲二忽五微

一 開除給發先後營造各座洋廠煙筒鐵鑪及公所房屋應用器具等項共支庫平銀三萬八千一百一十六兩四錢七分九釐一毫

一 給發兩次購買外洋大小緊要機器一切機器具腳價等項共支庫平銀九千四百四十九兩四錢四分五釐五

毫

一給發製造機器槍礮等項購買鋼鐵銅炭及一切雜用並創設水輪機器等項共支庫平銀一萬二千四百零五兩二錢九分八釐一毫一絲二忽五微

一給發委員司事薪水並機器匠工辛工及一切夫役工食等項共支庫平銀一萬七千三百八十一兩六錢一分以上統支庫平銀七萬七千三百五十二兩八錢三分二釐七毫一絲二忽五微前領之款別無存積

覆陳機器局暫緩開辦片

光緒五年九月二十三日

再臣欽奉

上諭四川機器局應否興辦著丁寶楨酌度辦理等因欽此查臣於光緒三年奏設四川機器局製造洋槍經營兩年規模甫定近因恩承童華奏請停辦

微臣謹即遵

旨裁撤竊惟外洋各國皆以槍礮雄視一時機智一啟而不可復塞殆亦天時人事之所趨中國固未可置之於不講蚩尤既作五兵而古聖不復廢弧矢之威漢陰雖有抱甕而通人不能棄桔槔之智今強敵各擅長技中國獨不屑蹈襲以爲墨守故常不難角勝且以爲可以購求於外洋此實自欺欺人之語固必不可得之勢也

微臣設局成

都專製造西洋上等之馬蹏尼後膛槍尙僅小小試辦其經費一項係於從前漏抽之土貨釐金籌畫規復餘款力求撙節支用始終並未動用正款兩年之間共用銀七萬餘兩而建造廠房者約用銀四萬餘兩其購辦外洋機器及自製機器二十五部並購料造槍以及委員司事工匠各人等薪水工食又創設水輪機器等項通計不過用銀三萬數千餘兩而創設水輪機器將來實可大省煤火之費在臣竊以爲較勝於外洋此後若逐年辦理所費約不過萬兩上下川人性近技巧臣挑其巧而樸者入局肄習頗多靈敏若逐漸講求必有日新月異之益恩承童華於機器局近在咫尺未嘗親臨一視而又不察經始之料物

工程輒指爲糜費一若必須年年造屋而後能造槍者措語不倫無可深辯微臣愧非負重之器經手事件深虞隕越於効奏時未便一一力爭茲奉

明旨垂詢機器彌深悚慙竊臣深以中國自強之術於修明政事之外首在精求武備所謂棄我之短奪彼之長也然中國自興造機器以來其時風氣未開多資洋人爲工師此實不得不然之勢臣竊以爲欲造機器決不能不仿西法而仿照西法僅可師其法窺其意而決不可用其人蓋我方學彼之長若再借彼人爲工師則西人之教法必將祕之而不能盡授卽中國人之心思亦將狃於故常而不能通靈是以臣於機器製造但規仿其法制而於一切

委員工匠等必專選中國通巧之人前在山東興造之局
自始至終決不用一洋人指示今則製造火藥洋槍亦幾
與西人相敵此次在川初設局時力主此意均招致中國
明習機器之士及工匠人等大約湖南江蘇山東等省人
爲多現在均已紛散回籍若再開辦仍須取材於他省成
都僻在一隅延訪亦固不易而川省諸事廢弛臣逐加整
頓無不創立規模事事親手經理早有日不暇給之勢論
本省應辦之事蓋亦不止機器一端均尙未有暇晷得以
從容討論才力短淺負疚實甚現在機器局業經停撤應
否暫緩開辦之處恭候

聖裁至近來請求機器實屬目前之要圖然頗爲衆論所

不許現在山東機器局係臣經手之事撫臣周恆祺必能力與淮持不使墮壞該局最得地勢機器亦富近來製造槍藥堪與外洋爭勝若將來量加擴充煉鐵造礮均屬便易如但就現在局面論之每年僅用銀二三萬兩以目前二三萬兩之經費而得備異日無窮之用亦何所憚而不爲其餘如津滬各局辦理既久規模大備尤應保全歷年成緒不致作輟之無恆專精不已異時當有收效之日臣迂拙之見未敢緘祕謹附片具陳伏乞

聖鑒訓示謹

奏

夔關收數短絀核實辦理摺

光緒五年九月二十三日

奏爲夔關驗放洋票日見加多照章免稅免釐短征愈鉅擬請核實辦理恭摺仰祈

聖鑒事竊

臣

查夔關每年額征正餘雜稅銀十八萬三千

七百四十兩四錢九分一釐又帶征渝關額稅銀五千一百五兩八錢五分九釐向來三江湖廣等省客商上水貨物過夔關納稅以棉花爲大宗洋貨雜貨次之川省土產各貨下水過夔關納稅以白蠟紅花爲大宗桐油生漆麝香藥材等物次之自光緒二年煙臺會議後准行洋票洋商所執准免稅釐照單載在約章凡該商在內地置物到第一子口報完稅項沿途關卡驗票放行不能重征經

臣

迭次通飭各關卡一體遵照辦理查光緒三年以前夔關經過洋票祇有上水洋廣雜貨所免稅釐已不爲少至四年正月以後洋票日多且有華洋各商由湖北宜漢兩關領單赴川採買土貨如白蠟紅花川絲麝香以及各項藥材等物均照約章免完稅釐本年春夏連月紛至沓來每日過關洋票免稅銀數幾多於額征之稅核計前署夔州府張轡新自光緒三年十一月初九日到任起至十二月止驗放過洋票一百三十八張免稅銀五千二百餘兩又自四年正月起至是年九月二十日卸任止驗放過洋票一千六百五十張免稅銀五萬五千七百餘兩現任知府黃毓恩自四年九月二十一日到任起至是年年底止驗

放過洋票七百四十九張免稅銀二萬三千九十餘兩先
後據該府等造冊稟報短征之數每年已近八萬兩均由
該府等分別賠解其五年冊報正月分驗放洋票三百七
十四張免稅銀一萬一千零八十餘兩二月分驗放過洋
票三百四十七張免稅銀一萬一千四百二十餘兩三月
分驗放洋票四百一十五張免稅銀一萬三千一百五十
兩零似此逐月增加通年牽算短征之數將在十萬兩以
外其夔局另免釐金亦係一律照免尙不在內迭據該關
監督夔州府知府黃毓恩等懇情稟報請將四五兩年免
過夔稅實數咨明湖北宜昌新關代征夔稅項下如數劃
抵以免賠累鉅款等情當經 臣等批司議詳咨商戶部暨

總理衙門及湖廣督撫臣核議嗣准部咨以此項關稅關係川楚兩省大局令臣等奏明請

旨辦理等因各在案茲據藩司程豫川東道彭名湜會同洋務局各道詳稱查近年川河上下水洋票日多一日卽夔關應征之額稅日減一日每年額解之正餘兩稅實在不敷甚鉅計自光緒四年正月起截至五年三月止共免過洋行稅銀十一萬四千餘兩連所免釐金每年將及三十萬兩經征之員萬難平空賠墊應請酌議變通章程責成夔州監督將每日驗放洋票按起鈔錄免稅實數按月彙報院司局各一次按季送部查核並將所錄洋票咨送宜漢兩關監督查明原發單照逐起核對俟年終統計

短征之數據實詳明咨會湖廣督撫臣覆核會同奏報一次一面由臣查明該關月報據實奏請於該關額征正餘雜稅項下照數劃除以昭核實仍於

國課毫無出入而於中外交涉事件及鄰省新征稅額均無窒礙且所免銀數均有宜昌等關給發洋商照單爲憑仍由宜昌等關查照夔關鈔錄洋票將原發清單按月比對似無慮以少報多其釐金局所免釐款亦令局員據實按月冊報與關冊互相比對儻關局各員別滋弊端卽行從嚴參辦等情詳請奏咨前來臣思宜昌關新收洋票入川之稅卽係夔關照約驗放免稅之款夔關免稅日多一日卽宜昌等關所收子口之稅日增一日名雖按照約章

征收正半各稅實則宜關代收夔關額征之稅此免彼征同爲一商之貨且查約章所載洋票各貨宜漢等關所收正半稅數目比夔關稅釐兩項本屬輕減商人趨利若鶩以致夔關驗票免征之貨愈多所征稅釐愈絀凡內地各商上下水貨物競在宜漢等關購買洋貨無論何省何人不分洋商華商均託名洋行運貨捆載往來如織驗票後免稅免釐隨到隨放川中饒源因而奇絀既有光緒二年煙臺新立條約可循又有宜昌等關單照可據所免稅釐斷難責令夔州關局各員平空代商賠墊計以後洋票有增無減勢必甚於今日無所底止該關局將同虛設該司道所議變通辦理實係因時制宜綜核名實起見相應請

旨勅下總理各國事務衙門會同戶部核定覆川以便遵辦至川省每年應撥夔關稅項協饒現在該關短收甚鉅應請查照減撥以昭公允而免短絀除分咨外所有夔關驗放洋票愈多短征額稅甚鉅並開報四五等年免稅銀數擬請核實辦理緣由是否有當理合恭摺具奏伏乞

皇太后

皇上聖鑒訓示謹

奏

西充建武肅親王專祠摺

光緒五年九月二十三日

奏爲公懇請建武肅親王專祠列入祀典由地方官春秋致祭以順輿情恭摺仰祈

聖鑒事竊據布政使程豫詳轉據署西充縣李蔚霖詳據紳民莊聯英等呈稱竊川省自前明之季流賊張獻忠擾亂全川民遭荼毒其殺戮之慘爲亘古所未有迨順治三年肅親王奉

命入川征討斬獻賊於西充縣之金山鋪全川底定載在省志昔年西充士民曾在縣屬鳳凰山麓公建武肅王祠歲時致祭以答前勛嗣以教匪之亂祠燬於火邑人復於公所立木主以祠迄今二百餘年士民感念不置因思近

年來文臣武將凡有功德於民經各省官民請建專祠者莫不奉

旨允准而肅親王天潢貴胄削平蜀難救萬民於水火而登之祗席豐功偉烈炳若日星以視近代諸臣勛業尤爲卓著乃專祠未建祀典缺然將何以崇德報功合詞懇縣具詳請於西充縣公建專祠載入祀典春秋官爲致祭用順輿情詳府由道移司核明請奏前來臣查武肅親王於國朝龍興之初建策督師屢平番部繼遂入關戡定中原勲烈之隆實越今古順治三年奉

命爲靖遠大將軍率師西征先平陝寇是年十二月征蜀偵張獻忠據西充爲巢穴長驅深入連克賊營一百三十

餘座遂斬獻忠於陣蜀寇悉平次年奏定郡縣事紀本傳
是西充一役實兩川撥亂反正一大關鍵至今二百餘年
永爲樂土厥後論勛

予謚立碑記功至乾隆四十三年奉
命配享

太廟並祀

盛京賢王祠世襲王爵已極崇德報功之典惟西充地方
父老流傳士民感慕歷久不忘公請建祠列祀情出至誠
合無仰懇

天恩准於該縣地方由士民建立專祠列入祀典地方官
春秋致祭以順輿情之處出自

聖裁是否有當理合恭摺具奏伏乞

皇太后

皇上聖鑒訓示謹

奏

都江堰穩固安瀾各州縣涸復田畝片

光緒五年九月二十三日

再修補都江堰上年衝刷隄工

臣

已於六月內將伏汛已

過隄身一律穩固據實奏陳並聲明俟霜降安瀾後再行察看情形具奏現在霜降已過據水利同知暨各屬稟報堰工各項工程普形堅實民田收成豐稔

臣

覆查屬實此

皆仰賴

聖主鴻福

臣

等不勝欣幸惟查農田水利關係於民生者

甚重現值我

皇太后

皇上勤求民瘼宵旰憂勞之際有不得不縷悉瀝陳者都江堰失修已百餘年各州縣被患亦數十年灌縣崇甯崇

慶鄆縣溫江金堂等處其久經淹沒不能耕種之田有案可稽約計二十餘萬畝而完善未淹之地尙時被衝損民甚病之灌縣寶瓶口向來立有水則但就十餘年來考之水勢極大亦不過十八九晝而止從未沒過水則而查之同治四年灌縣稟河西衝毀民田四萬餘畝五年衝毀民房甚多城垣亦經倒塌惟義和一鄉薄有收成其餘被沙石淤塞顆粒無收此兩年內據稟崇慶州一帶亦衝毀糧田六七萬畝六年七年十二年灌縣均衝毀民地民房橋梁官道甚多而七年水漲竟湧入城內歷經知縣楊若瀾錢璋柳宗芳等稟報在案光緒元年水患尤甚灌縣崇甯金堂新繁新都均衝毀民田房屋甚多淹斃人口二百餘

名數十名不等二年灌縣又衝毀糧田官道並導江橋一座衝刷無存歷經灌縣知縣胡圻馬德徵崇甯縣知縣祿壽金堂縣知縣王椿等稟報卽近時十年之間水患頻仍如此皆緣都江堰失修之故從前均視爲故常歷未奏報又查成屬十數州縣農民向於三四五六等月必有數次向督署及成縣道署索水他署並不過問其索水情狀則皆聚眾至千餘人閭堂塞署任意叫囂官吏出而勸導輒加毆辱卽總督道員亦只忍受不敢出問臣於三年三月到任四月內卽聚眾兩次赴臣署要水勢甚洶洶五月復然臣從未覩此橫暴情形深爲駭異及詢之地方文武始悉此風數十年來積慣如此臣因推求其故皆以爲都江堰

堰多年不修江身淤塞過甚水不順流故有被淹之處卽有缺水之處而離畢一處又經同治二年前督臣駱秉章發款興修飭派前成縣道何咸宜督辦誤從解夫之請將擋水三道巖鑿去以致水勢直衝離畢全無攔蓄不數年間遂將離畢衝缺一角此處極爲危險尤須力求保護等語臣旣見百姓要水之凶橫又聞離畢之危險若再仍前膜視何堪自同乃於三年十一月率同已革成縣水利道丁士彬暨各委員親往履勘目睹江身之淤塞與各隄工之朽壞實屬不堪言狀當以丁士彬職司水利乃飭令承修堰工計應挑江身長七十里淘挖深至一丈七八尺不等又修砌兩岸殘缺之隄數十里爲攔束之計而五月間

水勢暴漲沒過水則十九晝外又高出八九尺就水面漲勢與灘底寬深核計較同治以來水勢極大年分多至二丈以外實爲數十年來所未有父老驚爲異事而漲水從金剛牆衝決而出晏然順軌各堰層層消納但有灌漑之利絕無泛溢之患非但各州縣並未報災卽向來久經淹沒之二十餘萬畝並有涸復播種之處計灌縣涸復田四萬一千九十餘畝溫江涸復三千三百九十餘畝崇慶州涸復三千二百三十餘畝郫縣涸復一千五十餘畝崇甯涸復九百一十一畝均據各該縣會同委員切實勘報在案此但就業經耕種者言之而其已涸未種之地尙不在內本年九月初旬臣復委員會同各該州縣親歷查勘從前

淹沒之田現又涸復若干據實稟報茲據該印委各員會稟郫縣本年又涸出田一千一百三十八畝灌縣內江本年又涸復田九百一十餘畝外江涸復田二萬二千五百餘畝金堂縣涸復田七千一百三十八畝崇甯縣又涸復田一百四十六畝溫江縣本年又涸復田四百五十餘畝崇慶州本年又涸復田一千零二十七畝通計本年共實涸復田三萬三千三百一十餘畝合計去今兩年從前被淹之田已涸復八萬二千九百餘畝其溫江金堂兩縣田畝涸復已逾十分之九由此以觀今日堰工比較前數十年利害懸殊似有成效復查都江堰隄工成例凡隄衝壞若係水勢至寶瓶口水則十六晝以下則承辦之員與堰

長工頭均應著賠若過水則十六晝以上則應准免罰上年水勢沒過水則又高出數尺以致隄工衝刷此實川省堰工成例之所不問又查都江堰工自雍正初年議定歲修工需每年銀一千九百餘兩道光末年又續增銀三千九百餘兩工費已加增兩倍至同治初年以後則每年遞增五六千兩不等歲以爲常去歲臣飭司核計年來遞增之款已十一萬餘兩有奇均未經奏報有案查其原議係由司庫借發事後攤之用水各州縣彌補乃年年加增銀兩年年淹沒民地以致各州縣民力拮据迄今追繳頗覺爲難此等浮冒糜費十數年來誰復爲

國家一計及者現丁士彬等淘挖江身至七十里河道一

律深通卽隄工被水衝刷而以上年水勢極大竟不爲災
本年隄身一切並未似從前格外花費而水勢之大如故
江流一無壅缺民田毫末衝損且兩年之間從前淹沒田
畝已涸復至八萬數千餘畝之多此後但使承辦各員能
照雍正年間所定工需實用實支當可爲川省永遠之利
仰懇

特降嚴諭俾後來任事之人不致照前泄沓方能持久無
弊所有本年都江堰水已逾霜降工程民田普慶安瀾及
備陳此次修理堰工關係農田水利各緣由謹附片具奏
伏乞

皇太后

皇上聖鑒訓示謹

奏

清查鹽務大概情形摺

光緒五年十一月初十日

奏爲清查鹽務引張款項謹將大畧情形先行恭摺密陳
仰祈

聖鑒事竊臣前因查出鹽道蔡逢年發引朦混等弊奏參
革職查辦並以川省鹽務積弊過深附片陳請逐款清查
均蒙

俞允在案臣查川省鹽務之弊以改代改配最爲大端所
謂改代者如此縣額引全數銷完他縣引張尙多積滯則
以他縣滯引改歸此縣代銷所謂改配者如邊計各岸向
來應食本廠之鹽偶值井竈衰涸產鹽較少不敷配運而
他廠產鹽正極暢旺則停配本廠之鹽改配他廠之鹽此

本各省所通行

功令所不廢酌盈劑虛法良意美乃川省鹽務數十年來絕無紀綱墨吏貪商皆以改代改配爲售奸之私計查核所改各案或本岸額引尙多滯銷輒代行他岸之引或本廠之鹽方虞堆積已改配他廠之鹽商人只圖得改代改配之引張便可夾帶行私任意所之漫無界限而重照影射朦混百端其弊遂至不可究詰川鹽引張所以積滯至一百一十萬餘張之多皆原於此臣於光緒三年三月到任後察看全省釐務勢如亂絲從無下手之處因亟籌辦黔邊官運次辦滇邊官運眉目既清而邊引在官在商之弊不禁自絕然臣才智短淺綜核講求晝夜不輟竭兩載

之力黔滇僅有成緒其計岸及濟楚之鹽仍由鹽道經理
屢思設法整頓迄無餘暇但嚴飭蔡逢年以積弊之後不
可更增新弊每值接見之次未嘗不反覆申戒並諭以黔
滇辦有頭緒卽應清查全省鹽務亟宜清潔自矢毋得自
罹法網每見必言言無不盡蔡逢年非但不知奮勉輒以
官運已行鹽務弊端立見極意阻撓成法以冀規復昔年
邊計套搭之弊本年春間官運忽有裁撤之議蔡逢年遂
於數月之內卽私行改代至一萬餘引之多臣正微有訪
聞適查出發引朦混等弊一面參革查辦卽札飭司道督
同委員檢齊該衙門卷宗逐款清釐始知蔡逢年自光緒
二年六月初二日到任起至五年六月十三日交卸止甫

經三年先後改過水引二萬八千三百四十二張均未據
詳傳訊總商朱崇庚等據供每改引一張納送規費銀四
兩調查該商號簿呈證歷歷相符則改引至二萬八千數
百張所得規費已至十一萬數千兩實屬駭人聽聞此蔡
逢年私行改代改配圖得規費之實在情形也至鹽務關
鍵全在引張故引必由部頒領又須呈督署過印然後發
交鹽道收存以備地方官請領發商行運層層考核立法
防弊何等慎重乃蔡逢年任內至有商人呈請改代竟以
引張破爛挖補經過關卡不准盤驗之語於呈內明目張
膽聲敘而蔡逢年亦卽批准並鈔錄呈批照飭各關卡不
得盤驗破爛挖補引張似此辦法直是聞無天日此皆載

有印卷一覽而見又商人所請改引等事甚至一改已誤再請重改重改不已復請展限一展不已又請重展蔡逢年無一不准其承領光緒四年部頒額引據詳短少三百九十四張請動用餘引補足乃並不照原詳辦理私將餘引填入歸丁引張之內而以歸丁應行截留正引提作行銷之用輾轉轉巧於彌縫以至應存應發各引混淆不清而於各州縣歸丁引內挖補水陸字樣朦混充數者亦不一而足其樂山合州各處水陸引張一面議准歸丁一面又含糊發領臣上年始將各處歸丁引紙提歸督署全數封存以免朦蔽妄發此蔡逢年領引發引諸多朦混之實在情形也至各屬報解鹽釐銀兩蔡逢年於正短平水

之外復增添外短平外短水短新平短例平等名目並札飭印委各員令其照數補繳各屬因報解銀兩歷來無此辦法且其名目不經而又無力填補咸置不問蔡逢年輒於公款內照數扣提以作私款是利盡歸己虧盡在公此弊業經奏參在案現查均屬確實刻已札飭鹽道永遠革除以重公款而省委員之賠累臣查川省鹽務自道光三十年經前任督臣徐澤醇清釐之後迄今垂三十年弊端叢雜已不可問卽如改代改配之案歷任皆所不免聞近來各任鹽道每到交卸時必辦理改代改配以便多收規費號爲放礮名目鄙穢廉耻掃地又歸丁州縣其課稅已由地丁內報解此項引張不須配運行銷例應白截白繳

向來輒有含混發商以致百弊叢生餘引一項本須正引銷完後不敷配運方得發出配銷川省額引積滯甚多而餘引每夾雜發領此等在商未繳之殘引現經查明多至一百一十餘萬張充斥全省奸商視爲奇貨官吏無從稽考積引愈多則私鹽愈甚私鹽愈甚則公帑愈虧貽害無窮又查羨截一項道光三十年清查以前所短僅二十三萬兩有奇至咸豐元年及同治十二三年間遂積虧至一百餘萬兩又經升任安徽藩司前鹽道傅慶貽任內輒詳請於邊引每張應完羨截銀五兩內減完銀二兩以卹商力嗣知羨截係屬正款不可輕減又於該商所完鹽釐內撥出銀二兩解還道庫以彌補所減羨截之數此端一開

邊商挪此易彼巧爲舞弄非獨指撥鹽釐項下之二兩並未解還道庫卽應完之羨截銀三兩日久亦無著落數年之間羨截一項又增虧至三十餘萬兩之多現查明羨截銀兩先後統計共積虧至一百三十六萬餘兩幸自前年開辦官運此項撥釐作羨之弊始一旦杜絕而庫帑暗中所入爲數實多此項實非臣議辦官運時所能計及非此次清查無由得知亦可見鹽務之弊至深而莫可究詰矣臣維引張應完羨截定額無多已積虧至一百三十六萬餘兩此係有案可稽之款以此推之厯年鹽釐其消耗於無形者更難以數計鹺政何由得清

國計何日得裕現在以前各弊均經澈底查明此時亟應

力圖挽救以冀收之桑榆臣已督飭該司道委員等務將以後領引發引推代改展及帶銷殘引彌補欠帑各章程悉心參酌妥爲定議奏咨辦理爲日後永遠遵守之計不使再滋弊端然臣竊有請者微臣疊蒙

諭旨諄諄以整頓地方不可操之過蹙爲戒

訓詞深厚非獨啟發愚蒙之藥石抑亦經綸百政之遠謨謹當奉以終身弗敢失墜此次奏請清查鹽務良以受

恩深重睹此積弊過深若不澈底根究不惟昧盡天良亦將從何設法今各項弊端均已水落石出儻因此卽興大獄則以前株累良多而於歷年所失庫款究毫無裨益則所謂操之過蹙旣違

聖慈歷次之

訓誨亦非

微臣

奏請清查之本心現惟廣諮博訪安定新

章稍寬既往之愆嚴杜將來之弊如蔡逢年業經革職而情節較重卽按法嚴辦則亦咎有應得但數十年來踵事增華此時若必盡法懲治則牽涉太多辦不勝辦其實無益庫款實際將來結案時可否量從寬減之處出自

破格天恩其歷任鹽道惟傅慶貽任內改代改配之案較多且有詳請撥釐作羨之案增添弊竇未便置之不議將來結案時擬爲奏請處分以爲營私壞法者戒其餘各任或業經病故或署任未久應請無庸深究此次查出各端實係多年隱微深痼之積習臣不敢不據實瀝陳亦不敢

過爲苛擾但期切實整理設法收回歷年未繳之殘引痛絕私改代配之積弊以期計岸及濟楚之鹽可與黔滇邊引一律肅清以收

國家自然之利整頓數年當有成效可覩餘俟司道上詳後另行詳細奏請結案其應定章程俟定議後再行隨案奏請

勅部核議遵行謹將清查鹽務大畧情形先行繕摺附驛密陳伏乞

皇太后

皇上聖鑒訓示謹

奏